



Aarrit nannullu takornariartitsinermi tammajuitsussarsiorluni piniartartunut pisassiissutigineqarsinnaanngorsinnaanerat siunertaralugu Naalackersuisut 2022 naatinngu saqqummiunneqartussamik, nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiamittaaq aningaasarsiutaasinnaanerisa aammalu nunarsuarmioqatigiit aalajangersagaasa killilersugaat qulaajarneqassapput.

(Inatsisartunut ilaasortaq Aslak W. Jensen, Siumut)
(Siullermeerneqarnera)

Demokraatit isumaqarput, uani siunnersuummik pitsaasumik suliaqartugut.

Nunarput imatut inissisimavoq, Naalackersuisoqarluta, ajoraluartumik periarfissanik killilersuisunik, inuiaqatigiinni isertitanik qaffaataasinnaasunut. Imatut isumaqarpoq, innuttaasut inuunerannik pitsanngorsaanissamut periarfissaq ikilineqartut, akileraarutit akitsuutillu apparnissaannut periarfissat ikilipput aammalu politikikkut namminiilernissatsinnik sinnattorput siunissamut ungasissorujussuarput inissinneqarluni. Tassa tamanna Naalackersuisut kissaataat. Ajoraluartumik.

Tamanna tunngavigalugu isumassarsiatsialaavoq, nassuiaammik sananissaq, aarrit nannullu tammajuitsussarsiorluni piniarneqarnerisa ajunngitsortaanik ajortortaanillu qulaajaatit.

Siunnersuutip akuerineqarnissaa innersuussutigineqarpoq aammalu Aalisarnermut, Piniarnermut Nunalerinermullu Ataatsimiititaliami suliarineqartussanngorlugu innersuussutigineqarluni.